



ზოგადსაგანმანათლებლო
დანერგვითი ავტორიზაციის საბჭო

30/12/2024



MES 0 24 0001671644

გადაწყვეტილება

„შპს ათი აკადემია სტეპის ავტორიზაციის შესახებ“ ზოგადსაგანმანათლებლო დაწესებულებების ავტორიზაციის საბჭოს 2023 წლის 20 ოქტომბრის N 1414716 ოქმის პირველ ნაწილში ცვლილების შეტანის შესახებ

ზოგადსაგანმანათლებლო დაწესებულებების ავტორიზაციის საბჭოს სხდომაზე გამოვლენილი გარემოებების შესწავლის, შეფასებისა და ურთიერთშეჯერების შედეგად და საქართველოს ზოგადი ადმინისტრაციული კოდექსის 63-ე მუხლის პირველი პუნქტის საფუძველზე,

საბჭომ გადაწყვიტა:

1. შევიდეს ცვლილება „შპს ათი აკადემია სტეპის ავტორიზაციის შესახებ“ ზოგადსაგანმანათლებლო დაწესებულებების ავტორიზაციის საბჭოს 2023 წლის 20 ოქტომბრის N 1414716 ოქმის პირველ ნაწილში და ჩამოყალიბდეს შემდეგნაირად:

„1. შპს ათი აკადემია სტეპის ავტორიზაციის საკითხის განხილვა

საბჭოს თავმჯდომარემ, დავით მალაზონიამ, დაწესებულებების წარმომადგენლებს მიმართა, ხომ არ ჰქონდათ საბჭოს წევრების მიმართ აცილება. დაწესებულების წარმომადგენლებმა დაადასტურეს, რომ საბჭოს წევრების მიმართ აცილება არ ჰქონდათ. საბჭოს თავმჯდომარემ მიმართა საბჭოს წევრებს, დაედასტურებინათ, რომ იცნობდნენ ავტორიზაციის ექსპერტთა ჯგუფის დასკვნას და დაწესებულების მიერ წარმოდგენილ არგუმენტირებულ პოზიციას დასკვნის პროექტთან მიმართებით. საბჭოს წევრებმა დაადასტურეს, რომ იცნობდნენ საქმის მასალებს. საბჭოს თავმჯდომარემ ჰკითხა დაინტერესებული მხარის წარმომადგენელს იცნობდა თუ არა ავტორიზაციის ექსპერტთა ჯგუფის დასკვნას. წარმომადგენელმა დაადასტურა, რომ იცნობდა დასკვნას. შესაბამისად, საბჭოს თავმჯდომარემ საბჭოს მდივანს სთხოვა, რომ ექსპერტთა ჯგუფის დასკვნა დაერთო ოქმისთვის, როგორც მისი განუყოფელი ნაწილი. ექსპერტთა ჯგუფის დასკვნა საბჭოს სხდომაზე წარადგინა ექსპერტთა ჯგუფის თავმჯდომარემ, ქეთევან ბაცანკალაშვილმა. მან განაცხადა, რომ შპს - ათი აკადემია სტეპში საავტორიზაციო

ვიზიტი განხორციელდა 2023 წლის 24 და 25 ივლისს. ექსპერტმა აღნიშნა, რომ სკოლა მდებარეობდა ორ მისამართზე ქალაქ თბილისში, ალექსანდრე ყაზბეგის გამზირი, N34-N34ბ-სა და ალექსანდრე ყაზბეგის გამზირი N44-ში. დაწესებულებას სურდა განეხორციელებინა ზოგადი განათლების საბაზო და საშუალო ზოგადსაგანმანათლებლო პროგრამები, ქართულ ენაზე. ზოგადსაგანმანათლებლო დაწესებულებების სტატუსის მაძიებლის თვითშეფასების ფორმაში დაწესებულების მიერ მოთხოვნილი მოსწავლეთა ადგილების ზღვრული რაოდენობა იყო 240.

ექსპერტმა, ქეთევან ბაცანკალაშვილმა, აღნიშნა, რომ შპს აითი აკადემია სტეპი, როგორც ზოგადსაგანმანათლებლო დაწესებულება, ახლა ფუნქციონირებს. აქედან გამომდინარე, ორგანიზაციას არ ჰქონდა ზოგადი განათლების მიმართულებით დაგროვილი გამოცდილება და/ან საუკეთესო პრაქტიკა. მიუხედავად ამისა, დაწესებულებას საკმაოდ დიდი გამოცდილება ჰქონდა არაფორმალური განათლების სფეროში. სწორედ ამიტომ, ექსპერტმა ჯგუფმა მიზანშეწონილად მიიჩნია, წარმოეჩინათ შპს აითი აკადემია სტეპის ძლიერი მხარე მის არსებულ საქმიანობასა და ადამიანურ რესურსზე დაფუძნებით.

შპს აითი აკადემია სტეპი 2016 წლიდან ახორციელებდა კომპიუტერული მეცნიერებებისა და თანამედროვე ტექნოლოგიების მიმართულებით არაფორმალური განათლების საქმიანობას. ორგანიზაცია წარმოადგენდა საერთაშორისო კომპანიის - IT Academy STEP პარტნიორს, რომლის კურსდამთავრებულები დასაქმებულნი იყვნენ 1500-ზე მეტ კომპანიაში, მათ შორის, ისეთ გიგანტურ კორპორაციებში, როგორებიცაა: Microsoft, Facebook, Ebay, DELL, Amazon და ა.შ. დაწესებულებას ხელმძღვანელობდა მაღალი კვალიფიკაციის მქონე პირი, რომელსაც დიდი გამოცდილება ჰქონდა თანამედროვე ტექნოლოგიების სფეროში ბიზნესის მართვის, ახალგაზრდების განათლებისა და ფინანსური დაგეგმვის მიმართულებით. ორგანიზაციის ხელმძღვანელმა, მმართველი საბჭოს წევრებთან და აკადემიურ პერსონალთან ერთად, მიიღო გადაწყვეტილება დაეფუძნებინა ზოგადსაგანმანათლებლო დაწესებულება, რომლის მთავარი პრიორიტეტი იქნებოდა საბუნებისმეტყველო მეცნიერებებისა და თანამედროვე ტექნოლოგიების გაღრმავებული და ინტეგრირებული სწავლება ეროვნული სასწავლო გეგმით გათვალისწინებულ ყველა სხვა დისციპლინასთან ერთად.

ქეთევან ბაცანკალაშვილის განცხადებით ავტორიზაციის ექსპერტმა გუნდი შეთანხმდა, რომ აღნიშნული მიდგომა საკმაოდ ინოვაციური იყო დღევანდელ საგანმანათლებლო ბაზარზე, განსაკუთრებით იმ მოსწავლეებისათვის, ვისაც კარიერის გაგრძელება სურდათ STEM საგნების, კომპიუტერული მეცნიერებების, სამედიცინო სფეროს და ჯანდაცვის მიმართულებით.

ექსპერტის განცხადებით, ექსპერტმა ჯგუფმა შეისწავლა დაწესებულების მიერ წარმოდგენილი დოკუმენტაცია, განახორციელა ადგილზე დათვალიერება, ჩაატარა ინტერვიუები, რის საფუძველზეც გამოიკვეთა რიგი საჭიროებები და ექსპერტებმა ავტორიზაციის სტანდარტებთან შეუსაბამოდ მიიჩნიეს რამდენიმე კომპონენტი, რომლებიც დაწესებულების მიერ სტანდარტებთან შესაბამისობის უზრუნველყოფის გეგმის წარმოდგენის შემდეგ შეიცვალა, კერძოდ, პირველი, მეორე და მეოთხე სტანდარტები შეფასდა, როგორც „შეესაბამება“ სტანდარტის მოთხოვნებს, ხოლო მესამე სტანდარტი როგორც „ნაწილობრივ“ შეესაბამება სტანდარტის მოთხოვნებს. მესამე სტანდარტის კომპონენტები 3.4, 3.5 და 3.6 კი შეფასდა, როგორც „მეტწილად“ შესაბამისად.

ექსპერტმა აღნიშნა, რომ თითოეულ ინდიკატორთან დაკავშირებით, რომელიც შეფასდა მეტწილად შესაბამისად, ექსპერტმა ჯგუფის მიერ დაწესებულებისათვის გაცემული იყო რეკომენდაციები სტანდარტთან შესაბამისობის უზრუნველყოფის გეგმაში გაწერილი ვადების მიხედვით, რომელიც აღწერილი იყო ზოგადსაგანმანათლებლო დაწესებულებების ავტორიზაციის ექსპერტმა ჯგუფის დასკვნაში.

საბჭოს თავმჯდომარემ კითხვით მიმართა საბჭოს წევრებს, ხომ არ ჰქონდათ შეკითხვები ექსპერტებთან ან დაწესებულების წარმომადგენლებთან.

დაწესებულების წარმომადგენელმა, მაკა მახათაძემ განაცხადა, რომ მათ განათლების ხარისხის განვითარების ეროვნულ ცენტრში წარმოადგინეს შუამდგომლობა, რომლითაც ითხოვდა

ექსპერტთა მიერ დასკვნაში დაფიქსირებული გარკვეული რეკომენდაციების ბათილად ცნობას. კერძოდ ვიდეო კამერების დამატებასთან დაკავშირებით. დაწესებულების წარმომადგენლის თქმით, არგუმენტირებული პოზიციის ცენტრში გამოგზავნის შემდეგ წარმომადგენელი იყო დოკუმენტაცია, რომელიც ასახავდა რიგი ხარვეზის გამოსწორებას.

საბჭოს თავმჯდომარემ დავით მალაზონიამ აღნიშნა, რომ დასკვნაში ასახული ხარვეზების გამოსწორების დამადასტურებელი დოკუმენტაცია უნდა წარმოედგინათ ცენტრში.

საბჭოს წევრი, თამარ მამსიკაშვილი, ასევე, დაინტერესდა რამდენად იყო დაწესებულების შენობა ადაპტირებული სპეციალური საჭიროების მქონე მოსწავლისთვის.

დაწესებულების წარმომადგენელმა განაცხადა, რომ შენობაში უკვე დამონტაჟებული იყო პანდუსები და ადაპტირებული სველი წერტილები.

საბჭოს წევრმა, ზვიად გოგუაძემ, განაცხადა, რომ დაწესებულების სახელი არ შეესაბამებოდა სტანდარტს და არღვევდა 1.1.1.6 ინდიკატორის მოთხოვნას.

დაწესებულების მმართველი საბჭოს წარმომადგენელმა, ნინო ბეგიაშვილმა განაცხადა, რომ „მეწარმეთა შესახებ“ საქართველოს კანონის მე-16 მუხლის მე-8 პუნქტის, გ-ქვეპუნქტის მიხედვით რეგისტრირებისას, სამეწარმეო რეესტრმა განმარტა, რომ სიტყვა „IT“-ის ქართული შესატყვისი იყო „აითი“ , შესაბამისად, მათ რეგისტრაცია გაიარეს ამ სახელწოდებით. საბჭოს წევრმა დააზუსტა, რომ შეუსაბამობა ვლინდებოდა ზოგადსაგანმანათლებლო დაწესებულების/სკოლის აღმნიშვნელ ტეემინთან მიმართებით.

საბჭოს წევრი, შალვა მეკრავიშვილი დაინტერესდა და კითხვით მიმართა დაწესებულების წარმომადგენელს მოსწავლეთა გადაადგილების უსაფრთხოების საკითხთან დაკავშირებით.

დაწესებულების წარმომადგენელმა, ნინო ბეგიაშვილმა აღნიშნა, რომ დაწესებულების შენობები მდებარეობდა ერთ ეზოში და ერთმანეთისგან დაშორებული იყო მხოლოდ სამი მეტრით.

საბჭოს წევრმა მორის დანდურიშვილმა კითხვით მიმართა დაწესებულების წარმომადგენლებს შინაგანაწესში აღნიშნული აკრძალული ნივთების შესახებ, ის დაინტერესდა, რა ითვლებოდა ძვირადღირებულ ნივთებად.

დაწესებულების წარმომადგენელმა ნინო ბეგიაშვილმა განაცხადა, რომ დაწესებულებაში არსებული უსაფრთხოების სტანდარტებიდან გამომდინარე, რომლებიც იცავდა მოსწავლეს ნებისმიერი სახის ზიანისგან, შპს აითი აკადემია სტეპისთვის აღნიშნული ჩანაწერი იყო დამზღვევი მექანიზმი.

დაწესებულების წარმომადგენელმა, ლიკა გიორგაძემ განაცხადა, რომ აღნიშნული ჩანაწერი წარმოადგენდა დაწესებულების შიდა რეგულაციას.

საბჭოს თავმჯდომარემ მიმართა საბჭოს წევრებს, ხომ არ ჰქონდათ შეკითხვები სკოლის წარმომადგენლებთან ან ექსპერტებთან.

საბჭოს წევრებს შეკითხვები არ ჰქონდათ.

საბჭოს თავმჯდომარემ, კენჭისყრაზე დააყენა შპს აითი აკადემია სტეპის ავტორიზაციისა და მოსწავლეთა ადგილების ზღვრული რაოდენობის 240-ით განსაზღვრის საკითხი.

კენჭისყრის შედეგები:

მომხრე - 11

წინააღმდეგი - 0

გადაწყვეტილება:

„განათლების ხარისხის განვითარების შესახებ“ საქართველოს კანონის მე-11 მუხლის მე-2 პუნქტის „ა“ ქვეპუნქტის, მე-12 მუხლის, საქართველოს განათლებისა და მეცნიერების მინისტრის 2010 წლის 1 ოქტომბრის N99/ნ ბრძანებით დამტკიცებული „საგანმანათლებლო დაწესებულებების ავტორიზაციის დებულების“ მე-20 მუხლის პირველი პუნქტის „ა“ ქვეპუნქტის, მე-2 და მე-4 პუნქტების და 21-ე მუხლის პირველი, მე-2, მე-2¹ და მე-3 პუნქტების,

27-ე მუხლის მე-4 პუნქტის შესაბამისად, შპს - ათი აკადემია სტეპს (ს/კ: 405150465) 6 წლის ვადით მიენიჭოს ზოგადსაგანმანათლებლო დაწესებულების სტატუსი და მოსწავლეთა ადგილების ზღვრული რაოდენობა განესაზღვროს 240 - ით.

დაწესებულებას მიენიჭოს უფლებამოსილება განახორციელოს შემდეგი ზოგადსაგანმანათლებლო პროგრამები:

N	ზოგადსაგანმანათლებლო პროგრამის სახელწოდება	ზოგადსაგანმანათლებლო პროგრამის საფეხური	ზოგადსაგანმანათლებლო პროგრამის განხორციელების ენა	ზოგადსაგანმანათლებლო პროგრამის განხორციელების ადგილი (მუნიციპალიტეტის, ქალაქის, დაბის/სოფლის და ქუჩის მითითებით)
1	ზოგადი განათლების დაწყებითი საფეხურის ზოგადსაგანმანათლებლო პროგრამა	საბაზო	ქართული	საქართველო, თბილისი, ვაკის რაიონი აღ. ყაზბეგის გამზირი N 34 - N 34ბ; ქალაქი თბილისი, ალექსანდრე ყაზბეგის გამზირი, N 44.
2	ზოგადი განათლების საბაზო საფეხურის ზოგადსაგანმანათლებლო პროგრამა	საშუალო	ქართული	საქართველო, თბილისი, ვაკის რაიონი აღ. ყაზბეგის გამზირი N 34 - N 34ბ; ქალაქი თბილისი, ალექსანდრე ყაზბეგის გამზირი, N 44.

საბჭომ შუამდგომლობით მიმართა ცენტრს მონიტორინგის განხორციელებასთან დაკავშირებით:

საბჭოს გადაწყვეტილებით, დაწესებულებას განესაზღვრა რეკომენდაცია, კერძოდ, 2025 წლის ნოემბერში წარმოედგინა 3.4 კომპონენტის გარემოებების დამადასტურებელი მტკიცებულებები, ხოლო, სტანდარტების შესაბამისობის უზრუნველყოფის გეგმის შესაბამისად განსაზღვრულ ვადებში, ცენტრში წარმოედგინა მესამე სტანდარტის 3,5 და 3.6 კომპონენტების შესრულების დამადასტურებელი დოკუმენტაცია.“

2. ზოგადსაგანმანათლებლო დაწესებულებების ავტორიზაციის საბჭოს 2024 წლის 30 დეკემბრის N1670966 სხდომის ოქმის მესამე ნაწილი ცნობილ იქნას ამ გადაწყვეტილების განუყოფელ ნაწილად.

3. ზოგადსაგანმანათლებლო დაწესებულებების ავტორიზაციის საბჭოს გადაწყვეტილების გასაჩივრება შესაძლებელია კანონმდებლობით დადგენილი წესით და ვადაში, სააპელაციო საჩივრის სააპელაციო საბჭოში წარდგენის გზით (შემდეგ მისამართზე: ქ. თბილისი, მ. ალექსიძის ქ. მეორე შესახვევი №2) ან ქ. თბილისის საქალაქო სასამართლოს ადმინისტრაციულ

საქმეთა კოლეგიაში სარჩელის შეტანის გზით (შემდეგ მისამართზე: დავით აღმაშენებლის ხეივანი, N64).

სსიპ-განათლების ხარისხის განვითარების ეროვნული ცენტრი
ზოგადსაგანმანათლებლო დაწესებულებების ავტორიზაციის საბჭო
საბჭოს თავმჯდომარე
მალაზონია დავით



სსიპ-განათლების ხარისხის განვითარების ეროვნული ცენტრი
ზოგადსაგანმანათლებლო დაწესებულებების ავტორიზაციის საბჭო
საბჭოს მდივანი
ჯინჭარაძე მანანა

